



## 人瘟

對舊年年頭開始，每日看新聞就有在該報，講啊哪國有幾多人遭著新冠肺炎、哪國又有幾多人感染，該人數增加个速度實在有得人驚。聽啊聽地，認真惱起來，這種情況根本就係頭擺人講个發人瘟地！

係在老古時代，一發人瘟該下，人絕對會同看毋著个力量來求平安，最直接个就係去同神明求解方。對盡多這下个民俗文化來看，舊時代个人相信係神明肯遊莊遶境，將厥法力展示出來，該個莊頭就做得得著解脫。跔等个做法就係神明出來行，善男信女敬拜、打紙炮仔。紙炮打越響、打越多，佢等惱該就做得同瘟神逐走。故所，大家人就盡命牯打，就係愛打幾下日夜个紙炮仔，佢等都肯。

人啊！在毋知愛仰結煞該下最無力，乜最迷信！毋過，在該時代，科學發展無這下恁進步，係做得得著解方，分大眾有共同个信心來做共一件事，對防疫來講，又乜係一件好事。比將講打紙炮仔，這也無定著係另外一種个消毒方式。西方个哲者有講過：「係有一個地方發人瘟地，你就莫入去；係講你歇个地方發人瘟地，你就莫出去。」這正式係一個進步个思想，因為發人瘟會遭開來，就係因為人傳人个原因！

人瘟同雞瘟、發烏死無共樣，雞瘟會遭著，有時節係因為季節鳥同菌對外地帶入來，講愛防都難。該發烏死乜係，佢主要都還係透過老鼠仔來傳，人愛來預防佢，乜有一定个難度。毋過人瘟就無共樣，佢主要還係靠人傳分人。係第一個著病个人無同其他个人接觸，該就淨佢一個人著病。萬一佢傳出去，一人傳一人還係小可个情況，係出現一傳十、十傳百，嘎就壞蹄地！該下係愛來揪疫情，除地解藥同疫苗，實在就尋無第二個辦法。

發人瘟个菌，佢有過渡个「潛伏性」，在這期間人係著著病地，外項看毋出有麼个症頭。等到佢發病該下，早就已經帶等菌一哪仔去遭地十過日，該接觸過个人數也毋知有幾多地。毋過，今這下科學進步地！對著病个人下手處理，愛尋著遭病个源頭還係有可能个。最少做得知啊佢去過哪跡位，該兜所在就好去消毒，有去過該仔个人就愛知得先同自家隔離，這係自救乜係救人。

時代早就進步到知得發人瘟係麼个原因，就該病毒生做仰仔都清清楚楚，連佢仰仔來變種、進化都有法度知得，算來科學還係過可靠个方式。就係毋知仰還有人毋同心力放在尋解藥，還本本愛用老古時代个方式來求神明保佑？求神拜佛係使毋得，毋過廟埕係集忒多人在該，乜係傳人瘟个機會。愛求神，心肝肚求就做得，等日後疫情過後，再去還願就好。再過講，科學、醫學个方式還係愛跔政府个政令來行正著，好分這得人惱个人瘟早日結束。

發人瘟地！還係保守一息个生活，莫一哪仔去穿雜過羸，佢相信瘟神盡遽就會走地！

作者：陳志寧

### ☆詞彙學習☆

【人瘟】nginˊ vunˊ：人之間的傳染病。

【發烏死】bodˊ vuˊ xiˊ：黑死病。

【遊莊】iuˊ zongˊ：在村子裡遊行。

【穿雜】conˊ cab：與人接觸。

【雞瘟】gieˊ vunˊ：禽流感。